

欽定四庫全書

史部

滇考卷上二

井六詔爲一

六詔之稱尚矣予初至滇求其始末與竊據之處無知之者既而觀野史得皮羅閣建松明樓誘五詔同至祭祖因舉火焚死事且曰今滇中六月二十四日居民蒸炬相照稱星回節此其由來也夫南蠻以詐殺其同姓爭土地此固苗獠常事何以人至今效之隨又聞皮羅

閣為此計時人無知者惟邵暎詔妻慈善勸其夫毋行  
夫不從慈善以鐵釧約夫臂既而果被焚死各詔屍莫  
能辨慈善以鐵釧故得其夫屍歸葬皮羅閣聞其賢智  
欲娶之慈善佯諾俟葬夫百日乃嫁葬畢遂閉城自固  
曰某非忘夫事誓者南詔圍之三月食盡盛衣冠自縛  
於座竟以餓死南詔旌其城曰德源城嗟乎介之推死  
而至今有寒食屈靈均死而至今有競渡不忘忠義也  
茲星回節慈善足以當之矣慈善一稱寧北妃德源城

今在鄧川治東諸志皆載之然皮羅閣之并五詔又不  
止以松明樓也五詔者一曰浪穹詔蠻豐時據之一曰  
施浪詔蠻施望欠據之與鄧睽詔蠻豐咩所據俱在大  
理北是為三浪其西北曰摩些詔一名越析即今麗江  
府地蠻波衝所據地甚廣東南百五十里石壁上有色  
斑斕類花馬因又號為花馬國又其北為蒙嵩詔蠻嵩  
輔首據之古越雋地今為四川行都司五詔皆在蒙社  
詔之北故蒙詔稱南詔焉又有時旁詔矣川羅識詔不

在六詔之數皆哀牢雜種九十九部之後自相吞併而  
爲八又併而爲六也各受唐爵爲諸州刺史而屬於姚  
州都督府受劍南節度使節制南詔漸強皮羅閣承父  
志欲并吞五詔與張建成謀之建成曰蒙嵩越析遠隔  
異壤欲越三浪而取之勢難且二詔強大未易服宜先  
假通好後引強兵力攻三詔三詔歸我二詔不足平矣  
又曰六詔同爲唐臣非請於朝頓廢之懼見討今劍南  
節度使王昱好利厚賂以寶貨必爲我請然後動兵無

不濟也乃令人齎金寶厚賂王昱密求合六詔爲一朝  
廷許之皮羅閣既得朝命先密遣人說二詔蒙雋詔雋  
輔首死無子弟佉陽照立佉陽照死子照厚立其地聯  
吐番嘗慮鹵侵之而南詔方以破吐番受賞於是以子  
厚羅質南詔皮羅閣又遣人至越析講好越析地廣兵  
強素爲南詔畏忌而波衝妻美而淫豪酋張尋求烝之  
爲波衝所覺尋求懼誅遂與其妻謀殺波衝南詔使歸  
陳其事皮羅閣曰此弑逆大故朝廷當自討之無庸吾

力卽以問之王昱且曰請節度至姚州名而誅之一夫  
力耳昱用其策嚴兵抵姚名尋求至鎮數其罪殺之部  
落無長昱已入南詔賂且念其獻謀功卽以磨些地界  
畀之南詔不費一矢坐得花馬國波衝兄子于贈憤奪  
其國力不能爭乃持故王所寶鐸鞞東北渡河邑於龍  
怯河纒百里號雙舍使部酋楊墮居河東北治兵欲復  
故土皮羅閣攻之于贈樹壁攻不能克建成曰此窮寇  
也今當有三浪姑緩之乃還兵取浪穹浪穹遼曠相去

十五里及咩羅皮移迨川治大釐城與浪穹遠隔洱水  
皮羅閣恐其救浪穹以好言慰之咩羅皮感之不來援  
浪穹詔豐時死子羅鐸立羅鐸死子鐸羅望立爲浪穹  
刺史南詔兵至與戰不勝挈其部退保遷義督羅魯城  
更稱劍浪詔南詔遂有浪穹之地還兵乘咩羅皮不備  
以輕銳掩襲大釐咩羅皮率其部復入鄧賧據鍾山之  
險令人約浪穹施浪之衆合兵以拒南詔此時施浪勢  
孤弱又令族人施各皮據石和城互爲羽翼而皮羅閣



始出兵時先令子閣羅鳳別引精騎攻鹵施各皮施望  
欠孤立故欲與咩羅皮合然遙睽浪穹喪敗餘燼南詔  
大兵臨之三浪望風瓦解南詔席捲遙睽咩羅皮走保  
野共川而死其子皮羅遜于川東築城十里自固施望  
欠既敗南詔以兵脇降其部望欠不敢歸蒙次和村將  
攜其族屬北走吐番又恐爲追者所及乃以族走永昌  
獻愛女以乞和許之望欠走蘭江溺死其弟施望干走  
吐番吐番立爲詔納之劍川與鐸羅望等雜居衆尚數

萬皮羅閣破四詔惟蒙雋尚未加兵已而王照原表明  
子又質於南詔國中無主部下將別立宗屬南詔謀曰  
王瞽更立強明不易圖矣不若歸其子因令人隨往乘  
便圖之於是遣兵送原羅還國衆遂立之居數月送往  
兵士刦殺照原南詔遣兵應之遂據有越雋并鹵原羅  
以歸自南詔併有蒙雋土地開闢與吐番接壤乃使白  
蠻戍黎溪馬皮羅閣雖滅五詔猶恐遺孽尚存將遺後  
患於是建松明爲樓誘而焚之而浪穹之鐸羅望鄧賤

之皮羅逕施浪之施望于與蒙嵩之羅原皆爲火燼矣  
惟越析于贈遠不與會後閣羅鳳往擊楊墮破之于贈  
投瀘水死獲其鐔鞘以歸鐔鞘者狀如殘瓣有孔旁達  
出麗水飾以金所擊無不洞真入寶重月以血祭之五  
詔既滅其後嗣散居劍順之間者貞元中南詔北伐俱  
擄之徙永昌此南詔謀併六詔之始末也予既感慈善  
妃事且恨王昱以封疆大臣貪賄賂養南詔之惡卒以  
以善也著其事另爲一篇

南詔叛殺張虔陀李宓等

國家疆場之禍大率不始於一日其先必有以養之其  
既必有以激之而禍乃至不可救甚矣小人之悞國也  
南詔至開元天寶間已成尾大不掉之勢然而嫌隙未  
開彼猶重於發難夫以一隅之衆抗天朝之大彼有所  
憚而不敢發亦情也邊疆之人苟能待之以禮撫之以  
恩裁之以義則亦不難使常爲我用乃無賴小人不審  
勢度力橫肆侵暴辱之以不能堪逼之以不得已使彼

得有詞於下而逞於一決我復無力以制之一戰不利  
彼將曰上國之人固如是其不足畏而疆場之禍深矣  
嗚乎此張虔陀李宓之罪所當次王昱而同服上刑者  
也李宓初爲雲南太守後以都督同南詔討諸爨既以  
計激爨崇道殺爨歸王爨暹等惡南詔解其難奏南詔  
諸不法狀節度使郭虛已解之張虔陀亦雲南太守貪  
淫矯詐故事蠻酋謁都督必率其妻子與俱閩羅鳳既  
立率妻妾過度陀虔陀皆私之又多所徵求不應輒使

人辱罵由是怨憤日深閣羅鳳陰修城堡習馬練兵結  
好吐番以圖大逞於麼些九畎之地置鐵橋跨金沙江  
以通往來張虔陀知南詔謀唐亦於飽煙蘿山之南築  
一城以保禦不測天寶九載虔陀奏南詔將叛遣劍南  
節度使鮮于仲通出南谿路大將軍李暉從會同路安  
南都督王知進從步頭路討之閣羅鳳馳表陳虔陀六  
罪云吐番是漢積仇遂與陰謀擬共滅我一也誠節王  
之庶弟以其不忠不孝貶在長沙而被奏歸擬令間我

二也崇道茂盟搆逆罪合誅夷而却收錄與宿欲令仇  
我三也應與我惡者並授官榮與我好者咸遭抑曲務  
在下我四也築城收質繕甲練兵密欲襲我五也重科  
白直倍稅軍糧徵求無度務欲弊我六也書上明皇意  
稍解使中官賈竒俊詳復竒俊入虔陀賂是虔陀閻羅  
鳳怒因遣大將王毗雙羅恃等揚兵送檄問虔陀罪是  
冬發兵攻姚州虔陀戰不勝飲酖卒遂陷姚州都督府  
城中人皆移置別所空其城及小彝州凡三十二閻羅

鳳忿既洩又就安寧城使王克昭再申已寬克昭不允  
因攻安寧將陷聞鮮于仲通大軍已出戎爲進次曲靖  
意頗懼遣首領與雲南錄事叅軍姜如芝齎狀告仲通  
曰蚌鵠交守恐為漁父所擒乞居存見亾在得思失幸  
容自新願還所據復置府城仲通不聽進薄白崖漸逼  
江口閣羅鳳猶遣使再三陳乞且曰今吐番大兵壓境  
若不許當歸命吐番雲南之地非唐有也仲通怒囚其  
使密遣將王天運遠出點蒼山後欲腹背交攻閣羅鳳



遣子鳳伽異大將段儉魏迎山後師自統大兵戰於洱  
河適吐番救至與南詔兵合擊唐師大敗仲通僅以身  
免王天運亦為段儉魏所殺死者六萬人因遣次子鐸  
傅舊大酋望趙佺邵楊傅磨許及子弟十六人賞金寶  
赴吐番告捷吐番喜命宰相綺祥葉樂冊閣羅鳳為東  
帝給金印授鳳伽異大瑟瑟告身都知兵馬大將稱兄  
弟之國號贊普鍾猶言王弟也閣羅鳳遂以贊普鍾紀  
年僭號大蒙國以段儉魏為清平官賜名忠國即唐天

寶十一載也鮮于仲通既敗徵還以楊國忠領劍南節度使調天下兵征雲南十二載命漢中郡太守司空襲禮內使賈竒俊率師復置姚州以賈瓘為都督南詔使其將洪光乘及吐番論綺里徐同圍姚州復陷之擒賈瓘十三載劍南留後李宓等率十道兵討南詔衆凡十萬輦餉者不計涉海而疫死者相踵閣羅鳳密遣將絕其糧道誘宓深入至太和堅壁不戰宓糧盡欲引還適吐番論綺里徐兵至內外夾擊宓沉江死軍悉潰前後

死者二十餘萬人閻羅鳳曰生雖禍之始死乃怨之終  
今天子致討兵士何辜乃收亡將等屍祭而葬之今趙  
州有萬人塚焉十四載南詔復使洪光乘與杜羅盛段  
附克等奉清平官趙佗鄧統兵從昆明路與吐番相綺  
祥兼樂節度使尚棟贊等陷越雋會同軍肅宗至德元  
載復置越雋以楊廷珽爲都督兼固臺登吐番使人謂  
閻羅鳳曰不蚤除恐成枝蔓羅鳳遣子鳳伽異以重兵  
駐瀘水上會大軍將楊傅磨牟等與吐番軍將欺急歷

如數道齊入復陷越雋上元三年冬閣羅鳳降尋傳驃  
諸國尋傳國疇壤沃饒人物殷湊南通渤海西近大秦  
閣羅鳳刊木通道直抵其國以威武諭降之并下驃國  
始於漾共置謀統部與清平官楊佑等引兵東伐侵破  
碌取和子城又取鷄和城置石鼓縣於沙却地置俗富  
郡取澂江爲河陽郡閣羅鳳登覽昆州見安寧雄鎮爲  
諸巽要衝山對碧鷄波還碣石鹽池鞅掌利及牂歡城  
邑綿延勢連戎隄山河可以作藩屏川陸可以養人民

後二年命子鳳伽異於昆州置拓東城以鎮撫東爨又  
置安寧縣以蘇閉阿裒治之還兵太和城又遣楊佑撫  
治長州郡車氏枳碓等蠻佑於各地建城堡周迴相望  
數十里蠻民甚敬畏之封佑為長州郡公又取曲州靖  
州置石城郡遣昆州城使楊牟利以兵脅西爨徙戶二  
十餘萬於永昌城東爨以言語不通多散居林谷得不  
徙代宗大曆元年更築羊苴咩城于太和之北名大理  
立德化碑於太和城清平官鄭回撰文使叙已背唐歸

番非得已之故且曰我上世世奉中國累封賞後嗣容  
歸之若唐使者至可指碑澡祓吾罪也四年改元長壽  
又十年死僞謚神武子鳳伽異先死孫異年尋嗣追謚  
鳳伽異為悼惠王閣羅鳳父子雖兩戕王師觀其屢次  
陳乞收葬亾師終揭石碑以明已叛唐之故斯其心亦  
可哀矣倘得良節度使若韋仁壽韋臯輩撫而用之難  
何自生史稱楊國忠當國喜立邊功故李宓等阿迎其  
意後雖摧敗猶以捷聞卒之宓與虔陀絕命蠻境國忠

亦不免馬嵬之誅小人悞國國未亡而身先隕矣彼貪  
賄養亂之王昱征吐番不利亦卒貶嶺南以死嗟乎戕  
身名壞國事貪與淫之爲害各如彼顧可不畏哉顧可  
不謹哉

異牟尋復歸唐

異牟尋爲人有智數善撫其衆頗知書其臣鄭回者唐  
西瀛令閻羅鳳陷焉州得之重其惇儒號蠻利俾教子  
弟得捶榜國中無不憚鳳伽異異牟尋皆師事焉尋以

大曆十四年嗣立吐番冊爲日東王改元見龍悉衆二  
十萬入寇與吐番并力一趨茂州踰汶川擾灌口一趨  
扶文掠方維白壩一侵黎雅寇邛崃關令其下曰爲我  
取蜀爲東府工技悉送邛崃城歲賦一鰓於是進陷城  
聚人卒走山德宗發禁兵四千人使神策都將李晟將  
之發邠隴范陽兵五千使鳳翔節度使朱泚金吾衛大  
將軍曲環將之以救蜀東川出軍自江油趨白壩與山  
南兵合大敗吐番與南詔衆斬首六千級生禽與顛踣



屋峭且十萬吐番怒殺誘導使來者異牟尋始懼興元  
初遷屋羊苴咩城築袤十五里改國號曰大理改元上  
元封境內山川爲五嶽四瀆中嶽點蒼山東嶽絳雲靈  
山南嶽蒙樂山西嶽高黎共山北嶽玉龍山四瀆一曰  
黑惠江一曰瀾滄江一曰金沙江一曰潞江并建祠及  
三皇廟春秋致祭設官分職立把國事八人曰坦綽曰  
布燮曰久贊曰苜望曰正苜望曰員外苜望曰大將軍  
曰員外立九夾分理曰幕奕主兵曰宗奕主戶籍曰慈

奠主禮曰罰奠主刑曰勸奠主官人曰厥奠主工作曰  
萬奠主財用曰引奠主客曰禾奠主商賈皆清平宮首  
望大將軍兼之又立三托曰乞托主馬曰祿托主牛曰  
巨托主廩大府主將曰演習副曰演覽中府主將曰繕  
裔副曰繕覽下府主將曰澹首副曰澹覽小府主將曰  
幕撫副曰幕覽府有陀首陀西即管記判官之類王自  
稱曰元謂其下曰昶王后曰信麼妃曰進武外有六節  
度曰美棟今姚安地曰永昌曰銀生今景東鎮沅曰劍

川曰麗水曰拓東令安寧昆陽之間上元中鳳伽異築  
城於此有二都督曰會川曰通海治民者有十賧一曰  
雲南賧一曰白崖賧又曰勃弄賧一品澹賧一遣川賧  
一蒙舍賧一大釐賧又曰史賧一苴咩賧又曰楊賧一  
蒙秦賧一矣和賧一趙川賧人丁壯者皆爲戰卒王之  
親兵曰朱弩佉苴佉苴韋帶也兵百人置羅苴子統一  
人羅苴子戴朱鞮鍔負犀革銅盾而跣走險如飛自當  
長以降繫金佉苴尚絳紫有功加錦又有功加金波羅

民兵出以望直靈先驅以清平子弟為羽儀長八人清  
平官見王不得佩劍惟羽儀長佩之凡田五畝曰雙上  
官授田四十雙以是為差農無貴賤皆耕不徭役人歲  
輸米二斗是時南詔之境東至於銅柱鐵橋蟠桃玉榆  
東南至於交趾南至於驃國木落山西至於太石西北  
至於吐番北至於神川東北至於黔巫縱橫數千里國  
富兵強每為吐番所役責賦重數悉奪其險立營堞歲  
索兵助防異牟尋苦之鄭回因乘便說曰吾國兵強不

下於吐番而反爲役屬此自斃也中國有禮義少求責  
非若吐番憚利無極也今棄之復歸唐無遠戍勞利莫  
大此異牟尋善之稍謀內附然未敢發會李泌亦勸德  
宗招雲南以斷吐番右臂德宗乃使韋臯爲劍南節度  
使臯撫諸蠻有威惠東蠻頗得異牟尋語白於臯臯乃  
遣謀者遺南詔書吐番覺之遣兵二萬屯會川以塞雲  
南趨蜀之路又索大臣子爲質異牟尋愈怨貞元五年  
乃決策歸唐與酋長定計遣使趙莫羅眉由西川揚大

和堅由黔中東蠻鬼主驃旁且由安南凡三輩異道同  
趨成都遣臯帛書曰異年尋世為唐臣曩緣張虔陀志  
在吞侮中使者至不為澄雪舉部惶窘得生異計鮮于  
仲通比年舉兵故自新無緣代祖棄背吐番斯孤背約  
神川都督論訥舌使浪人利羅式眩惑部姓發兵無時  
今十二年此一忍也天禍蕃延降覺蕭牆太子弟兄流  
竄近臣橫汙皆尚結贖陰計以行屠害平日功臣無一  
二在訥舌等皆冊封主小國奏請不令上達此二忍也

又遣訥舌逼城於鄙契邑不堪利羅式私取重賞部落  
皆驚此三忍也又利羅式罵使者曰滅子之將非我其  
誰子所富當為我有此四忍也今吐番委利羅式甲士  
六十待衛因知懷惡不謬此一難忍也吐番陰毒野心  
輒懷搏噬有如媮生寔汙辱先人辜負部落此二難忍  
也往退渾王為吐番所害孤遺受欺西山女王見奪其  
位拓跋首領並蒙誅刈僕固志忠身亦喪亡每慮一朝  
亦被此禍此三難忍也往朝廷降使招撫情心無二詔

函信節皆送蕃廷雖知中夏至仁業爲蕃臣吞聲無訴  
此四難忍也曾祖有寵先帝後嗣率蒙襲王人知禮樂  
本唐風化吐番詐結百情懷惡相成異牟尋願竭誠自  
新歸欵天子請加戍劍南西山涇源等州安西鎮守揚  
兵四臨委同鶻諸國所在侵掠使吐番勢分力散不能  
爲疆此西南隅不煩天兵可以立功云且贈臯黃金丹  
砂臯謨送使者至京師使者奏異牟尋請歸天子爲唐  
藩輔獻金示順革丹赤心也德宗嘉之賜以詔書命臯



遣謀往視臯令其屬崔佐時至羊苴咩城時吐蕃使者  
多在陰戒佐時衣牂牁使者服以入佐時曰我乃唐使  
者安得從小彝服異牟尋夜迎之設位陳燎佐時即宣  
天子意異牟尋內畏吐蕃顧左右失色流涕再拜受命  
使其子閣勸及清平官與佐時盟點蒼山載書四一藏  
神祠石室一沉西洱水一置祖廟一以進天子鄭回見  
佐時多所指導故佐時探得其情乃請牟尋攻吐蕃使  
者殺之刻金契以獻遣曹長段南羅趙迦寬隨佐時入

朝留二旬有六日而歸閣勅賦詩以餞之於是南詔復  
爲唐臣初吐番與回鶻戰殺傷甚乃調南詔萬人異牟  
尋欲襲吐番陽示寡弱請以三千人行不許益至五千  
乃許之即自將數萬踵後晝夜行大破吐番於神川遂  
斷鐵橋溺死以萬計俘其五王取鐵橋等十六城乃遣  
弟湊羅棟清平官尹仇寬等二十七人又獻地圖方物  
又上吐番所封日東王金印去吐番所立帝號請復號  
南詔帝賜賚有加拜仇寬左散騎常侍封湊羅棟爲高

溪郡王明年夏六月冊異牟尋為南詔王以祠部郎中  
袁滋持節領使成都少尹龐頤副之崔佐時為判官俱  
文珍為宣慰使劉幽巖為判官賜銀窠黃金印文曰貞  
元冊南詔王印由石門趨雲南滋至太和城異牟尋遣  
兄蒙細羅勿等以良馬六十迎之金鍍玉珂兵振鐸夾  
路陳異牟尋金甲蒙虎皮執雙鐸執矛千人衛大象  
十二引於前騎軍徒軍以次列詰旦受冊異牟尋率官  
屬北面立宣慰使東向冊使南向乃讀詔冊相者引異

牟尋去位蹠授冊印稽首再拜又授賜服備物退曰開  
元天寶中曾祖及祖皆蒙冊襲王自此五十年貞元皇  
帝洗痕錄功復賜爵命子子孫孫永爲唐臣因大會其  
下享使者出銀手脫馬頭盤二謂滋曰此天寶時先君  
以鴻臚少卿宿衛皇帝所賜也有笛工歌女皆垂白示  
滋曰此先君歸國時皇帝賜樂部龜茲音聲二列今喪  
亡略盡唯二人故在耳酒行異牟尋奉觴滋前滋受觴  
曰南詔當深思祖考成業抱忠竭誠永爲西南藩屏使

後嗣有以不絕也異牟尋拜曰敢不承使者所命滋還  
復遣清平官尹輔首等七人謝天子獻鐸鞘浪劍鬱刀  
生金瑟瑟牛黃琥珀氎紡絲象犀越賤統倫馬朝廷賜  
賚甚厚各授官有差十一年暹國王雍羌亦遣使同南  
詔使獻其國樂凡二十二曲與樂工三十五人其曲皆  
演梵音一低一昂未嘗相對凡五譯而至成都羣集  
復譜次其聲作南詔奉聖樂奏之詔封雍羌爲彌臣國  
王七月異牟尋攻吐蕃復取昆明城以食鹽池又破施

蠻順蠻並鹵其王置白崖城因定麼此蠻隸昆山西爨  
故地破芒蠻掠弄棟蠻漢棠蠻以實雲南東北開北方  
賤徙洱河白蠻羅落麼此冬門尋丁哦昌七種蠻以實  
其地九月獻馬六十四匹十二年異牟尋取越賤置軟化  
府十四年遣酋望大將軍任邛各等賀正無獻方物十  
五年謀擊吐番以遼川寧北等城當寇路乃峭山深壑  
修戰備帝許出兵助力又請以大臣子弟質於臯臯辭  
固請乃盡舍成都咸遣就學且言昆明雋州與吐番接

不先加兵爲所脅反爲我患請舉圖之時唐兵比歲屯  
京西朔方大峙糧欲南北並攻取故地然南方轉餼稽  
期兵不悉集是夏蕃麥不熟疫癘仍興贊普死新君立  
臯揣蕃未敢動乃勸異牟尋緩舉萬全愈於速而無功  
今境上兵十倍往歲且行營皆在焉州扼西瀘吐蕃路  
昆明可以無虞異牟尋請期它年吐蕃大臣以歲在辰  
兵宜出謀襲南詔閣衆治道將以十月圍焉州軍屯昆  
明凡八萬皆命一歲糧贊普以舅攘鄰羅爲都統遣尚

乞力欺徐濫鑠屯西貢川吳年尋與臯相聞臯命部將  
武免率弩士三千赴之亢榮朝以萬人屯黎州韋良金  
以二萬五千人屯高州約南詔有急皆進軍過俄準添  
城者南詔供饋吐番引衆五萬自囊貢川分二軍攻雲  
南一軍自諾濟城攻雋州吳年尋畏東蠻磨些難測懼  
爲吐番鄉導欲先擊之臯報雋州實往來道扞蔽數州  
蕃百計窺之故嚴兵以守屯壁相望糧械處處有之東  
蠻庸敢懷二乎吳年尋乃檄東磨些諸蠻內糧城中不



者悉燒之吐番顛城將楊萬波約降事洩吐番以兵五千守臯將擊破之萬波與籠官拔顛城以來徙其人二千於宿川臯將扶忠義又取末恭城俘擊牛羊千計贊普大將既煎讓律以兵距卜貢川一舍而屯國師馬定德率衆落出降西貢節度監軍野多輸煎者贊普乞立贊養子當從先贊普殉亦諳忠義降於是番氣衰軍不振欺徐濫鏢至鉄橋南詔毒其水人多死乃徙納川壁而待是年蕃霜雪早兵無功還期以明年苦唐詔犄角

亦不敢圖南詔臯令免按兵雋州節級鎮守雖南詔境  
亦所在屯戍吐番懲野戰數北乃屯三瀘水遣論莽熱  
誘瀘瀘諸蠻復城悉攝悉攝吐番險要也蠻酋潛導南  
詔與臯部將杜毗羅徂擊十七年春夜絕瀘破蕃屯斬  
五百級蕃保鹿危山毘羅伏以待又戰蕃大奔於時康  
黑衣大食等兵及吐蕃大酋皆降獲甲二萬首又合鬼  
主破蕃於瀘西吐番君長共計不得雋州患未艾常謂  
南詔爲兩頭蠻以挾唐爲輕重也會蕃薦饑方葬贊普

調歛煩至是大料兵率三戶出一卒蕃法爲大調集又  
聞唐兵三萬入南詔乃大懼兵戍納川故洪諾濟臘聿  
賚五城欲悉師出西山劍山收雋州以絕南詔臯即上  
言京右諸屯宜明斥候蚤歛田邠隴焚萊可困蕃入臯  
遣將邢毗以兵萬人屯南北路趙昱萬人戍黎雅州異  
牟尋謂臯曰蕃聲取雋州實窺雲南請武免督軍進羊  
苴咩若蕃不出者請以來年二月深入時蕃兵三萬攻  
鹽州帝以蕃多詐疑繼以大軍詔臯深鈔賊鄙分其勢

臯表賊精鎧多置南屯今向鹽夏非全軍欲掠河曲黨  
項畜產耳俄聞蕃破麟州臯督諸將分道出或自西山  
或由平曩或下隴陀和石門或經神川納川與南詔會  
是時回鶻太原邠寧涇原軍獵其北劍南東川山南兵  
震其東鳳翔軍當其西蜀南詔深入克城七焚塚百五  
十所斬首萬級生擒論莽熱獻於朝獲鎧械十五萬圍  
昆明維州不能克乃班師振武靈武兵破鹵二萬涇原  
鳳翔軍敗吐蕃原州惟南詔攻其腹心俘獲最多帝遣

中人尹偕慰異牟尋而吐蕃盛屯昆明神川納川自守  
異牟尋比年獻方物天子禮之十九年正月旦上御含  
元殿受南詔朝賀以其使楊模龍武爲試太僕少卿韋  
臯亦以招南詔破吐蕃功進檢校司徒兼中書令封南  
康郡王帝製紀功碑賜之憲宗元和三年異牟尋卒帝  
聞爲廢朝三日遣太常卿武少儀持節弔祭冊其子尋  
閣勸爲南詔王賜元和新印其國人私謚異牟尋曰孝  
桓上尋閣勸尊號曰驃信帝改元應道以善闡爲東京

太和爲西京四年死僞諡孝惠王子勸龍晟甫十三歲  
多狎小人既冠益淫肆嗣位十年爲其下王嵯巔所弒  
而異牟尋之業始衰

### 王嵯巔入寇

王嵯巔南詔弄棟節度使一名蒙苴顛唐永貞元年勸  
龍晟嗣立改元龍興淫肆不道十年王嵯巔因民怨弒  
之僞諡幽王立其弟勸利晟恐唐見討去帝號求和唐  
爲廢朝遣少府少監李銑爲冊立弔祭使勸利晟立改

元全義賜王嵯巔姓蒙氏號大容華言大兄也任清平  
官決國事是時黃洞蠻屢叛邕管間連歲被兵嵯巔乘  
釁遂東寇安南然朝貢每歲不絕穆宗長慶三年始賜  
印是年勸利晟死於東京偽諡靖王子豐佑嗣豐佑矯  
敢善用其下慕中國始不連父名唐書謂佑乃利晟弟  
野史滇載記皆謂利晟子仍連父名稱晟豐佑焉穆宗  
使京兆少尹韋審規持節冊立豐佑遣洪成首趙龍叱  
楊定竒入謝文宗太和三年與王嵯巔謀入寇以蜀卒

爲鄉導十一月襲破雋戎二州又陷邛州遂北抵成都  
成都自韋臯結好南詔四十年無蠻倣兵備懈弛節度  
使杜元穎不恤士卒士多流入蠻境蠻衣食之盡得蜀  
之虛實以故長驅無能禦者惟蜀將尹偃率衆數萬保  
邛峽關聞蠻寇至恃勇出關逐蠻數里伏發馬倒中數  
十創而死蠻入成都止西郭十日慰資居民市不擾肆  
將還乃取諸經籍掠子女工技數萬引而南人懼自殺  
者不勝計救兵至嗟巔身自殿至大渡河謂蜀人曰此



南吾土也爾去國當哭聽爾哭別故鄉衆皆號慟赴水  
死者十二三餘皆被掠歸自是南詔工技文織與中國  
侔矣十二月東川節度使郭釗為書責嵯巔背盟朝廷  
亦遣將董重質率大兵南伐嵯巔懼因復書郭釗歸罪  
杜元穎以修好焉明年豐佑上表自陳無䟽杜元穎之  
罪已復遣使入朝朝議移李德裕為西川節度使德裕  
既至議韋臯領內資結蠻好示以戰陣文法啟戎資盜  
其策非是今非痛革不能刷一方恥乃建籌邊樓按南

道山川險要與蠻相入者圖之左西道與吐番接者圖  
之右其部落衆寡饋運遠邇曲折咸具名習邊事者與  
之指畫商定凡二邊情僞盡知之又料擇伏瘡舊獠與  
州兵之任戰者奏遣耨耄什三四士無敢怨又請甲人  
於安定弓人河中弩人浙西由是蜀之器械皆犀銳率  
戶二百取一人使習戰貸勿事緩則農急則戰謂之雄  
邊子弟總十一軍築伏羲城以制大渡清溪關之阻作  
禦侮城以控榮經犄角之勢作柔遠城以扼西山吐番

復邛崃闢徙雋州治臺登以奪蠻險又轉邛雅粟以佐  
內粟陽山之運十月為漕始不涉炎月輦夫得免瘴毒  
自德裕為劍南完殘奮怯皆有條次於是二邊寢懼南  
詔請還所俘掠四千人五年又遣使貢方物六年南詔  
掠驃國民三千徙之拓東文宗開成四年五年武宗會  
昌二年俱遣使來朝六年復寇安南節度使裴元裕死  
之自德裕經理四川蠻不敢窺蜀遂專力東方安南日  
苦兵革矣宣宗大中十年南詔於東京建五華樓以會

西南彝十大國君長樓方廣五里高百尺上可容萬人又樹碑金馬山以記方物十二年安南經畧使李琢苛墨自私以斗鹽易一牛彝人不堪結南詔將段首遷陷安南都護府號白衣沒命軍南詔發朱弩佉首一千助守然朝貢猶歲至十三年豐佑死於東京佑在位三十六年改元二曰保和天啟偽諡昭成王子世隆嗣南詔野史稱王嗟巔弒豐佑而篡位段宗榜救緬回誘誅之立世隆滇史載篡位被誅者楊苴顛也然唐書古滇

說滇載紀皆不載豐佑被弑事姑缺之南詔至豐佑王  
嗟顛而蠻益輕中國矣杜元穎不恤士卒蜀民被擄李  
琢苛墨自私安南遂陷然則豈蠻之能輕中國哉自取  
之耳李德裕為劍南其事不在滇而予詳志之以見有  
善於治國之人蠻夷自不得逞其長技也乃在廷方朋  
黨相傾以至於敗唐宣宗曰去河北賊易去朝中朋黨  
難茲於南詔亦云

世隆僭號

世隆以唐宣宗大中十三年立改元建極先是世隆父  
豐佑遣使朝貢利賜與從者多杜棕自西川入朝表無  
多納蠻僉豐佑怒即謾言索質子已而佑死是年宣宗  
亦崩懿宗遣內臣告哀世隆初立凶狠悖慢謂我國亦  
有喪朝廷不弔問詔書乃賜故王於是以草具進使者  
而遣還朝廷以世隆名犯廟諱復無朝貢不告國喪亦  
絕冊立弔祭使世隆遂僭號稱皇帝改國號大禮改西  
京曰中都善闡東京曰上都寇播州陷之咸通元年陷

武州安南都護李鄴棄州走以王寬代之二年攻邕管  
經畧使李宏源兵少不能拒奔蠻州南詔亦引去詔殿  
中監段文楚為經畧使數改條約衆不悅以胡懷玉代  
之九月又寇雋州時杜棕為相方議遣使弔祭宣撫并  
詔驃信以名嫌冊命未可舉必易名乃得封命左司郎  
中孟穆持節往會隆陷雋州遂止不行三年以蔡叢為  
安南都護時七縮洞首領李由獨附蠻王寬不能制故  
以叢代之叢發諸道兵二萬屯守南詔憚畏不敢出左

庶子蔡京經制嶺南忌龍功乃言南方自無虞武夫幸  
功多聚兵耗餽運請選戍兵惜財用襲執不可願留五  
千兵累表不報即極陳南詔伺隙久有十必死狀朝廷  
不省也拜京西道節度使京褊伎貪尅峻條令爲炮熏  
剗斫法下愁毒爲軍中所逐走藤州矯制作攻討使印  
名鄉兵北道軍攻邕州不克衆潰貶死崖州以桂管觀  
察使鄭愚代節度南詔攻交州進略安南龍請救發湖  
荆桂兵五千屯邕州詔襲按軍海門襲請濟師以山南



東道兵千人赴之南詔將楊思偕麻光高以兵六千薄城而屯四年正月攻益急襲錄異年尋盟言繫矢上射入其營不荅俄而城陷襲問宗死者七十人幕府樊綽取龍印走渡江督荆南兵入東鄂苦戰斬南詔二千級是夜蠻遂屠城殺鹵十五萬人有詔諸軍保嶺南更以秦州經畧使高駘為安南督護南詔逼邕州鄭愚自陳非將才願更擇人會康承訓自義成來朝乃授嶺南西道節度使發荆襄洪鄂兵萬人從之承訓辭兵寡乃大

興諸道兵五萬往六月置行交州於海門進為都護府  
調山東兵萬人益戍以容管經畧使張茵鎮之因命經  
畧安南茵逗留不敢進安南之陷將吏遣人多客伏溪  
洞詔所在招還揀恤之免安南賦二年分兵屯容藤披  
蠻勢五年南詔回掠雋州以搖西南西川節度蕭鄴率  
屬蠻鬼主邀南詔大渡河敗之明年復來攻會刺史喻  
士珍貪猾陰掠兩林東蠻口縛賣之以易蠻金蠻至開  
門降盡殺戍卒士珍遂臣於蠻安南久屯兩河銳士死

瘴毒者十七夏侯攷言張茵懦不足事請悉以兵授高  
駢從之駢以選士五千渡江敗林邑兵於邕州擊南詔  
龍州屯楊思偕燒貲畜走世隆遣楊緝思助段首遷共  
守安南以范胙些爲安南都統趙諾眉爲扶邪都統七  
年六月駢次交州戰數勝士酣鬪斬其將張詮李溘龍  
舉衆萬人降拔波風三壁緝思出戰敗還走城士乘之  
趨埭入斬首遷胙些諾眉上首三萬級安南平初駢過  
江約監軍李維周繼進維周擁衆壁海門駢次峯州大

破南詔收所獲贍軍維周忌之匿捷書不奏朝廷不知  
駢問百餘日詔問狀維周劾駢玩敵不進更命右武衛  
將軍王晏權往代駢而駢已拔安南斬首遷等晏權方  
挾維周發海門檄駢北歸適駢遣王惠贊傳首遷首京  
師見艫艦甚盛乃晏權等惠贊懼奪其書匿島中間闕  
至京師天子覽書御宣政殿羣臣皆賀大赦天下進駢  
檢校刑部尚書仍鎮安南初世隆遣清平官董成等十  
九人詣成都節度使李福將廷見之成請以敵國禮見

福不許導譯五反日旰士倦議不決福怒命武士捽辱之械繫於館俄而劉潼代福節度即挺其繫表縱歸有詔召成等至京師見別殿賜物良厚慰遣還國明年世隆使楊苜慶等來謝釋囚且歸成都俘三千人先是李師望請析邛蜀嘉眉黎雅雋七州為定邊軍建節度制機事近且速廷議是之即以師望為節度使治邛州距成都才五舍雋州最南去邛乃千里緩急首尾不相副而師望利專制諱不言裒積無厭私賄以百萬計又欲

激蠻怒幸有功乃殺首慶等既而戍士怒將醢師望以  
逞會名還以竇滂代之滂杳冒尤不法誅責苛纖甚于  
師望時蠻役未興而定邊已困世隆怨殺其使十年乃  
入寇以軍綴清溪關密引衆伐木開道經雪岷盛夏卒  
凍死者三千人遂奄至沐浴川閱嘉州破屬蠻遂次沐  
源滂遣充海兵五百往戰一軍盡覆世隆乃身自將督  
衆五萬侵雋州攻清溪關屯將杜再榮絕大渡河走諸  
屯皆退保北涯蠻攻黎州詭服漢衣濟江襲犍為破之

裴回陵榮間焚廬舍掠糧畜薄嘉州刺史楊志與南詔  
夾江而軍士攢射九日八夜蠻不得進陰自上游濟背  
擊王師殺忠武將顏慶師志走嘉州陷明年正月攻杜  
再榮竇滂自勒兵戰世隆遣使者十輩請和滂信之語  
未半蠻桴爭岸譟而進滂不知所為將自殺武寧將苗  
全緒止之殊死戰蠻稍却滂乃遁全緒殿而行黎州陷  
人走匿山谷蠻掠金帛不勝負入自邛崃關圍雅州遂  
擊邛州是冬滂棄州壁導江儲貲峙械皆亡失世隆進

次眉州坦綽杜元忠日夜教世隆取全蜀於是西川節  
度使盧耽召彭州刺史吳行魯共修守備遣其副王偃  
中人張思廣約和蠻疆之使南面拜然卒不見世隆而  
遂蠻次新津耽復遣副譚奉祀好言申約蠻留之耽畏  
援軍未集請降大使通好以紓其深入懿宗遣太僕卿  
支詳為和蠻使蠻本無謀不能乘機會鼓行亟驅但虵  
結蠅營忸鹵剝小利處處留屯故蜀孺老得扶攜悉入  
成都閭里皆滿戶所占地不得過一牀雨則冒箕盎自



鹿城中井為竭則共飲摩訶池至爭拌溺死者澄管沙  
取滴飲之死不能具棺即共坎瘞之故瀘州刺史楊慶  
復為耽治攻具選悍士三千號突將為長刀巨搥分  
左右番休日隸于軍士心侈欲闢世隆給耽請上介至  
軍議事耽遣節度副使柳榮往見坦綽杜元忠議和元  
忠言驃信見耽自議之請具車蓋葆嬰以三百騎負幄  
幕來大言曰供帳隋蜀王廳事為驃信行在耽不許仍  
馳去蠻稍前傳外郭于是游奕使王晝督援兵三千屯

毗橋竇滂亦以其軍自導江來將與大軍犄角然戰不  
甚力小不勝即保廣漢自以失定邊覬成都陷得薄其  
罪會有詔斥徙軍遂無功耽部將李自孝者與刺史喻  
士珍善士珍臣蠻自孝陰與賊通乃說耽城下蔣葦稻  
澗水頽城舉府不之覺蠻攻城自孝守陴樹麾以自表  
為下所覺耽殺自孝以狗城左有民樓肆蠻俯射城中  
耽募勇士燒之二月蠻以雲染鵝車四面攻城中以巨  
索鉤繫投膏炬車焚箱間蠻卒盡死耽遣李瑋張察

突將戰城下俘斬二千級蠻撤民郵落爲蓬籠如車傘  
下設枕木推而前不及城丈匿蠻其內以穴墉楊志以  
甕貯糞潘汝蠻蠻不能處注以鐵液蓬籠皆火然南詔  
負衆益治器械斧斤晝夜有聲將擊錦江樓衆失色耽  
遣將出三面苦戰始引卻蠻利夜晦輒薄城城上聞呼  
嘯衆齊奮施鐵籠千炬賊來不得隱支詳至遣諜與約  
好且謂耽毋多殺以速蠻和是時傳言救師至城中合  
謀開門士爭出迎軍南詔搏戰不解日入判官程克裕

以北門兵二千乘之蠻乃走耽猶遺之書謝不得已交  
兵且請和士脫鎧迎支詳詳陳所齎植二旗署曰賜雲  
南幣物謂蠻使者曰天子詔雲南和解而兵薄成都奈  
何請退舍撤警以修好或勸詳蠻多詐毋入死地詳不  
行蠻復圍成都夜穿西北隅黎旦乃覺即頽焚火于壘  
蠻皆死穴中以鐵絙曳雲輅仆之燎作少選盡益固守  
是時帝遣東川節度使顏慶復為大渡河制置劍南應  
接使兵次新都博野將曾元裕敗蠻兵斬二千級南詔

騎數萬晨壓官軍以騁大將宋威以忠武兵戰斬首五  
千獲馬四百尾南詔退屯星宿山威進戍沱江世隆遣  
酋望楊定至支詳所請和詳曰今列城固守北軍望功  
歸語而主審自度耽遣銳將趨蠻壁燒攻具殺二千人  
為南詔所躡卻而潰蠻聞鳳翔山南軍且來乃迎戰毗  
楊不勝趨沱江為伏士所擊又敗城中出突將夜火蠻  
營世隆袒縛身督戰後三日王師奔昇僊梁蠻大敗夜  
燒亭傳乘火所向雨矢射王師威疏軍行嚮矢所發叢

射之兩軍不能決各解去世隆知不敵夜撤營南奔至  
雙流江無梁計窮將赴水死或止之曰今北軍與成都  
兵合若來追我無類矣不如偽和以紓急不然死未晚  
乃來請三日梁成而濟即斷梁按隊緩驅黎州刺史嚴  
師本收散卒保邛州世隆懼圍二日去壘俘華民必剽  
耳鼻已縱之既而居人刻木為耳鼻者什人慶復之來  
衆以其弟慶師死于壘必甘心及成都不破以已功輕  
乃按軍廣溪縱殘寇人人切齒初成都無隍塹乃教耽

澹隍廣三丈作戰棚于陴列左右屯營營列五區區卒  
五十時皂莢夾壕後三年合拱又為大旛連弩自是南  
詔憚之世隆年少嗜殺戮親戚異已者皆斬兵出無寧  
歲諸國更讐忿屢覆衆國耗虛蜀之役男子十五以下  
悉發婦耕以餉軍十四年坦綽復寇蜀絙舟大渡河以  
濟為刺史黃景復擊却之衆循河而南夜檉上流夾攻  
瀕水諸屯景復敗走還黎州設伏以待蠻躡追之為景  
復所敗歸至之羅谷會蠻踵來還攻大渡河什旗息鼓

請曰坦綽欲上書天子白寃事成兵信之不戰橋成而  
濟黎州陷遂攻雅州擊定邊軍卒潰入邛州成都大震  
人亡入王壘關士乘城坦綽遣使者王保成等四十人  
齎驃信書遺節度使牛勣欲假道入朝請憇蜀王故殿  
勣欲許之楊慶諫曰蠻無信彼禮屈辭甘詐我也請斬  
其使留二人還書勣因責之曰詔王之祖六詔最小夷  
也天子錄其勤合六詔爲一伴附庸成都名之以國許  
子弟入太學使習華風今乃自絕王命且雀蛇犬馬猶



能報德王乃不如蟲鳥乎比成都以武備未修故令爾  
突我疆場然毗橋沱江之敗積皆附城今吾有十萬衆  
捨其半未用以千人為軍十軍為部驍將主之凡部有  
疆弩二百鎗斧輔之勁弓二百越銀刀輔之長戈二百  
撥刀輔之短矛二百連鎚輔之又軍四面面有鐵騎五  
百悉收芻薪米粟牛馬犬豕清野待爾吾又能以旁騎  
哈爾樵采我日出以一部與爾戰部別一番日中而代  
日昃一部至以夜屯月明則戰黑則休夜半而代凡我

兵五日一殺敵爾乃晝夜戰不十日惜且死矣州縣皆苦  
甲厲兵犄角相從皆蠻之深讐雖女子能黥斷薄賊况  
強夫烈士哉爾祖嘗奴事西番為爾仇家今願臣之行  
思讐之戾邪蜀王故殿先世之寶宮非邊彝所宜舍神  
怒人憤驃信且死所差王保成四十人送書並已囚繫  
候軍前爨鼓今發遣鄮龍段首遷二人持此報書是時  
叢猶火郊民室廬觀閣嚴兵為固守計坦縛至新津而  
還回寇踪中經略使秦匡謀懼奔荆南會僖宗立遣全

吾將軍韓重持節往使俄攻黎州黃景復擊走之僖宗  
乾符元年劫掠雋雅間破黎州入邛峽闢掠成都成都  
閉三日蠻乃去詔徙太平軍高駢領西川節度使移鎮  
成都駢乃奏蠻小醜勢易制而蜀道險館饑窮乏今左  
神策所發長武河東兵多用度繁廣且彼皆扼制羌戎  
不可以弛備詔乃罷長武等兵駢未至先以帛書軍號  
其人仍畫一符于郵亭遞之以壯軍聲蠻懲交阻之敗  
望驛而還至不淹月閱精騎五千遂蠻至大渡河奪鎧

馬執酋長五千斬之收邛崃關復取黎州南詔遁還駢  
名景復責大渡河之敗斬以徇戍望星清溪等關南詔  
懼遣使者詣駢結好而踵出兵寇邊駢斬其使初安南  
經畧判官杜驤為蠻所俘其妻李瑤宗室女也故世隆  
遣瑤還遮木夾遺駢使馬和解駢答以牒其略云雲南  
頃者求合六詔併為一番與開道途得接邛蜀賜書習  
讀降使交歡禮待情深招延意厚片善既知大恩合報  
忽窮兵黷武掠土侵疆再犯朗寧重陷交趾兩俘邛蜀

一割黔巫凌犯不休貪殘轉甚昔交趾都護不閑理兵  
朗寧元戎未解誅寇受以侵欺容其殘暴某比者親征  
海裔克復龍編沈白衣沒命之衆如赤日消冰殺朱弩  
佞苴之軍若洪爐焰雪其于勝負詔國洞知昨日來鎮  
西川移從汶水仗節單車大開城門放出人物固無疑  
阻直擬誅鋤不比從前師臣只務姑息前詔遣張棟成  
等揚言和好身纔入境兵已繼來侵欺大國榮感元戎  
戮侯之儀須依古典並已軍令處置詔國前後停鹵約

十萬人今獨送杜驥妻言是沒落杜驥守職本在安南  
城陷驅行故非沒落星霜半代桎梏幾年李氏偷生空  
令返國杜驥早歿不得還鄉今則訓練番兵指揮漢將  
鐵衣十萬甲馬五千邕交合從除蜀齊進勲名須立國  
史永書且杜驥官銜李瑤門第不是親近但王室疎宗  
天枝遠派而已李氏并詔國木夾並差人押領進送朝  
廷故牒世隆得書大震先是成都府無羅郭壘至遂成  
灰燼士民無久安之計駢畫地議築之慮畚鍤將施亭

金史四庫全書  
卷上  
瑛有警乃命門僧景仙入南詔宣言躬自巡邊凡九十  
三日樓櫓備具旗旆竟不行自南詔叛使至其境世隆  
不肯拜駢以其俗尚浮屠法故遣景仙攝使往世隆與  
其下迎謁且拜乃定盟而還遣清平官酋望趙宗政質  
子三十八朝乞盟請為兄弟若舅甥詔拜景仙鴻臚卿  
檢校左散騎常侍計結吐番為間築戎州馬湖沐源川  
大渡河三城列屯拒險料壯卒為平糞軍南詔氣奪世  
隆志發疽死于越雋景淨寺偽謚景莊皇帝自世隆嗣

立以來為邊患殆二十年中國為之虛耗然安南之陷  
以蔡京之伎尅定邊軍之敗以李師望竇滂之貪庸召  
亂有由千古一轍也盧耽力保成都足稱墨守他則牛  
叢之書高駢之牒讀之猶強人意乃卒無能踰大渡河  
而南少雪國恥者君子以是嘆唐祚之將終也雖然南  
詔至世隆而戰將勁兵半盡于外其國亦漸衰矣

唐與南詔和親

唐末南詔屢為邊寇皆邊帥不得其人以啟之苟制



之有道其順則役使之可也否則誅之可也即力不能  
制嚴關隘增戍卒絕不與通亦可也以堂堂天朝而欲  
與講舅甥之禮嗟乎此有唐所以不振也世隆死子隆  
舜嗣改國號曰大封民國改元貞明承智大同自號大  
封人隆舜年少好畋獵酣逸衣絳紫錦罽鍔金帶國事  
頗決大臣乾符四年遣陀西段琬實詣邕川節度使立謙請  
修好詔使者答報未幾寇西川高駢奏請與和親右諫  
議大夫柳韜吏部侍郎崔澹醜其事上言遠蠻叛逆乃

因浮屠誘致又議和親垂笑後世駢職上將謀乖謬不可從遂寢螭使者再入朝議和親而駢徙荆南持前請不置詔宰相鄭畋盧攜議之攜是駢議畋不可攜怒拂衣起袂罨硯墮地破之上聞之曰大臣相詬何以儀型四方皆賜罷辛讜遣幕府徐雲虔攝使者往覘到善闡府見騎數十曳長矛擁絳服少年朱繒約髮典客伽陀苜孫慶曰此驃信也問天子起居下馬揖客取使者佩刀視之自解左右鈕以示乃除地剗三丈版命左右馳

射每一人射隆舜駮馬遂以為樂數十發止引客就幄  
雲虔與驃信抗禮驃信不悅使人謂雲虔曰貴胄欲驃  
信稱臣奉表貢方物驃信已遣人與唐約為兄弟不則  
舅甥何表貢之有雲虔曰驃信之先由大唐之命得合  
六詔為一恩德深厚中間乖隔小忿罪在邊鄙今驃信  
欲修舊好豈可違祖宗故事乎順祖考孝也事大國義  
也息戰爭仁也審名分禮也四者皆令德也可不勉乎  
驃信聞此言乃設宴禮待侏子捧瓶盃四女子侍樂飲

夜乃罷又遣問客春秋大義授以木夾遣還終不肯奉  
表稱貢是時駢徙節鎮海劾澹等沮議帝蒙弱不能曉  
下詔慰解西川節度使崔安潛上言蠻畜鳥獸心不識  
禮義安可以賤隸尚貴主失國家大體澹等議可用臣  
請募義征子率十戶一保願發山東銳兵六千戍諸州  
比五年蠻可奴久之帝手詔問安潛和親事答曰雲南  
姚州譬一縣中國何資于彼而遣重使加厚禮彼且妄  
謂朝廷畏怯無能爲脫有他請陛下何以待之且天宗

近屬不可下小蠻彝臣比移書不言舅甥黜所僭也有  
如蠻使者不復至當遣謀人伺其隙可以得志南詔知  
蜀疆故嚴安南陷之都護曾袞奔邕府戍兵潰會西川  
節度使陳敬暄申和親議時盧攜復輔政與豆盧瑑皆  
厚駢乃請說帝曰陛下初即位遣韓重使南詔將官蜀  
留蜀暮年費不貲蠻不肯迎及駢節度西川招盟末繕  
甲訓兵蠻彝震動遣趙宗政入獻見天子附驃信再拜  
雲虔之使驃信答拜其于禮不爲少宣宗皇帝收三州

七關平江嶺以南至大中十四年內庫貲積如山戶部  
延資充滿故宰相敏中領西川庫錢至三百萬緣諸道  
亦然咸通以來蠻始叛命再入安南邕管一破黔州四  
盜西川遂圍盧耽名兵東方戍海門天下騷動十有五  
年賦輸不納京師者過半中藏空虛士死瘡瘍燎骨傳  
灰人不念家亡命爲盜可爲痛心前年留宗政等南方  
無虞及遣還彼猶冀望蒙法立三年比兵不出要防其  
蓄力以間我虞今朝廷府庫匱兵甲少牛叢有北兵七

萬首尾奔衝不能救况安南客戍單寡涉冬寇禍可虞  
誠命使者臨報縱未稱臣且伐其謀外以縻服蠻彝內  
得蜀休息也帝謂然乃以宗室女爲安化長公主許婚  
拜嗣曹王龜年宗正少卿爲雲南使大理司直徐雲虔  
副之內常侍劉光裕爲雲南內使霍承錫副之及還具  
言驃信誠欵以爲敬瑄功故進檢校司空賜一子官隆  
舜遣宰相趙隆眉楊竒混段義宗朝行在迎公主高駢  
自揚州上言三人者南詔心腹也宜止而鴆之蠻可圖

也帝從之隆眉等皆死自是謀臣盡蠶益衰中和元年  
復遣使者來迎主獻珍怪璫罽百牀帝以方議公主車  
服爲解光啟二年又遣布燮楊奇肱來迎詔檢校國子  
祭酒張醜爲禮會五禮使徐雲虔副之宗正少卿嗣虢  
王約爲婚使未行而黃巢平帝東還乃歸其使滇中諸  
書紀和親事俱言以宗室女妻之南詔野史載唐僖宗  
廣明元年以安化公主和親光啟元年滇王遣楊奇肱  
送公主歸唐與唐史不合安化公主傳亦未載入滇事



故斷從正史云昭宗乾寧四年隆舜以嬖崑崙女淫虐  
無道為其臣楊登所殺偽諡宣武子舜化真嗣亦遣使  
欵黎州上書修好唐欲報以詔書王建曰小無不足以  
辱詔臣在西南彼何敢犯塞從之舜化真立四年布燮  
鄭買嗣殺之奪其國追諡孝哀蒙氏自細奴邏至舜化  
真傳十四世共二百四十七年世隆好殺隆舜多嬖寵  
臣下專政故不二世而國亡

鄭買嗣趙善政楊干貞篡奪

唐亡中土易代者五分國者十而南詔之後亦造有鄭  
趙楊三姓篡奪之事豈弒逆大故上闕氣運遠近宜同  
受之乎噫亦可異矣鄭買嗣者鄭回之後世為清平官  
及買嗣執政蒙隆舜多嬖幸淹留善闡縱殺戮失下人  
心買嗣密令豎臣楊登弒之而立其子舜化真買嗣廣  
布心腹與高贇協謀盡除異已誘化真歸中都化真不  
知輕車西回入宮被逆時唐昭宗天復二年也買嗣自  
立改國號曰大長和改元安國追尊鄭回為高祖諸蠻

三十七部心不服謀起兵問罪買嗣懼誅楊登以塞衆口然銀生部如景東鎮沅及金齒白蠻終不服從在位八年死偽謚威德桓皇帝子仁旻嗣時後梁朱溫開平四年也乾化四年冬寇蜀黎州蜀主王建遣夔王宗範擊敗之俘斬數萬級後唐同光元年仁旻遣其弟清容布燮歸仁慶侯鄭昭淳使于南漢致朱髻白馬以求婚昭淳好學有文辭南漢主劉龔與之游宴賦詩龔及羣臣皆不能逮遂以兄劉隱女增城公主妻仁旻三年後

唐破蜀獲前王建所俘南詔蠻及故判官徐靄靄徐雲  
虔姪也自言曾同雲虔使雲南因遣送還所俘以招撫  
南詔仁旻不納是年服丹藥死凡立十五年改元五日  
天瑞景星安和貞佑初厯偽諡肅文子隆亶嗣改元天  
應後唐天成元年雋州山後蠻都鬼主李卑晚與大渡  
河南山前印州六姓都鬼主勿定標抄皆受唐爵為將  
軍明年牂牁蠻亦遣使者宋朝化貢草豈寇朱砂等物  
昆明大鬼主羅殿王普露聲王各遣使附牂牁朝唐明

宗遣左金吾衛將軍馬昭遠為入蠻國信使不能達而  
還是時隆亶幼弱其下東川節度使楊干貞以朝見入  
東京毒殺之偽諡恭息干貞欲自立畏鄭氏族多恐有  
變乃推侍中趙善政立之鄭氏三傳歷年二十有六而  
為趙氏趙善政寧北佞逸墜人微時採薪山中午寢夢  
神為具薪明日復然途行天落石于前石裂有朱文曰  
善政為天子干貞弑主皆善政與謀且以石文之異因  
推立善政令盡殺鄭氏後買嗣舊臣高氏等不平然畏

干貞皆變姓名自匿善政篡立改國號曰大天興改元  
尊聖夫成三年有為善政謀者曰干貞以惡名歸人旋  
欲自利計甚狡也宜解其兵柄以漸除之不然禍必及  
善政以為然干貞聞之大怒擁兵入朝廢善政幽殺之  
偽諡惠康善政立甫十月而為楊氏楊干貞和村人母  
彌承有殊色蒙隆舜私之有孕後適漁人楊氏生干貞  
父捕魚貞在船見水中有人龍衣冠冕鳳鳥白光之祥  
呼父視之見是兒影大喜後遂滅趙改國號曰大義寧

欽定四庫全書  
卷上  
改元興聖後又改大明在位凡八年疑忌羣下誅戮不測貪虐無道中外咸怨通海節度使段思平起兵討之千貞不能禦出走永昌自縊死偽諡肅恭時後晉天福二年也

段氏大理國始末

段氏之先為武威郡人唐天寶末段儉魏佐蒙氏有功賜名忠國擢清平官六傳而生思平思平生有異兆及長智量不凡仕為通海節度使楊千貞篡立思平圖雪

國憤深自韜晦于貞忌之思平慮不免卜于秀山神祠  
往巴甸就其舅爨判自匿于貞索捕甚急思平與買嗣  
舊臣高氏暱高方爲善巨守亦有志興復密遣人招思  
平思平與其弟思良軍師董伽羅走就之追者在後晝  
夜兼行至藥師寺避入計必死頃之追者去出視則門  
封蛛網矣至品甸波大村得竒戟又葉鏡湖有妖物夜  
出食人行旅不敢進思平持戟暮至見水際隱隱有光  
如匹練逼視之一馬伏不動收得之乃神驥也日行數



百里追者莫能逮行山谷中餒甚摘野桃剖食之核膚  
有文曰青昔思平怪之以語董伽羅對曰青乃十二月  
昔乃二十一日今楊氏政亂吾當是日舉義乎遂至善  
巨與高氏謀高曰東方諸部聚之可得勝兵數萬人動  
以大義罔不濟矣遂往借兵東方黑蠻三十七部皆助  
之會于石城衆十餘萬鼓行而西所向無敵師至河尾  
是夕思平夢人斬其首又夢玉瓶耳缺又夢鏡破懼不  
敢進董伽羅曰三夢皆吉進也公為文夫夫去首為天

天子兆也玉瓶去耳爲王王者兆也鏡中有影如人有  
敵鏡破則無影無影則無敵也三夢皆吉進也思平乃  
決明旦引兵欲渡莫知所從見江尾一婦被璫而浣者  
指曰人從我江尾馬從三沙美爾國名大理從之得濟  
遂以後晉天福二年十二月二十一日入闕楊干貞戰  
不勝率妻子走永昌欲入緬國以圖恢復思平追至萬  
箭樹自縊死親屬皆俘思平自立改國號大理都羊苴  
咩城改元文德盡逐楊氏邪臣除苛令以董伽羅爲相

國封高氏為岳侯分治成紀巨橋等地封熒判為巴甸  
侯祠秀山神加恩三十七部于是遠近歸心諸彝君長  
各來貢獻後晉開運二年卒在位八年偽諡太祖子思  
英素不肖思平在日常欲廢之以諸臣諫止將死謂弟  
思良曰吾子非承大業者爾其善續吾緒思良泣受命  
及思英立改元文經淫戲愈甚董伽羅諫不聽乃與思  
良謀以先王命廢為僧而立思良改元至治在位六年  
以後周廣順元年死偽諡聖慈子思聰嗣改元明德明

年又改廣德時蜀王孟昶不理國事日務奢縱委任非  
人大理覘知之欲乘釁攻蜀高侯不可言蒙詔強盛時  
與吐番連兵尚不能侵奪巴蜀卒以黷武釀內變宗社  
不保今聞周主英明削平僭亂孟蜀必為所併吾國第  
當修葺城堡練兵養民以觀時變何必勞師遠征啟釁  
召禍思聰從其言不敢入犯在位十八年死傳子素順  
時宋太祖已正位中國王全斌受命平蜀欲因兵威取  
滇以圖進上太祖鑒唐之禍基于南詔以王斧畫大渡

河曰此外非吾所有也由是雲南不隸中國素順在位  
十七年改元明政好黃老恬淡無為之教于是道教始  
盛黃冠徧滿國中然恭儉自持下人奉令守職國中稱  
為賢明太宗雍正二年卒偽諡應道子素英嗣時雲南  
大旱素英為民禱雨或言金輪寺有圓石如磨高僧摩  
伽陀所遺天旱以石浸池天即雷雨名曰濟旱石遂欲  
令人舁取岳侯曰遠難致也因就都下黑龍潭以虎頭  
投之石曰攪龍以龍虎能致風雲也果得雨淳化五年

李順亂蜀招安使雷有終遣辛怡顯使南詔時蜀順賊  
與南蠻結連為寇朝廷覓能使滇者不可得乃詔募命  
官士庶通邊事者往黎雋界招撫之故辛怡顯自薦請  
行至道元年始迄事而歸後作雲南錄獻之南寧酋長  
龍漢琬遣使率西南牂牁八番諸彝貢方物素英在位  
二十四年改元五曰廣明明應明聖明統明治真宗祥  
符二年卒偽諡昭明子素庶嗣改元啟明素庶一子阿  
統性頑鈍不知禮義飲博好色宣淫于國中素庶嘗以

為憂乃與國相謀立其姪素隆為嗣而廢阿統幽于別館六地通飲食乾興元年素庶卒在位十四年偽諡宣肅姪素隆嗣改元明通阿統之廢也素庶之妻撫統子素真素真幼警敏識人意表阿統幽死祖母憐素真不得立使人讓高相高相言于素隆素隆避位為僧傳國素真素隆在位五年亦無失德後卒諡秉義仁宗天聖四年素真立改元正治在位十五年卒偽諡聖德子早卒孫素興立改元聖明時仁宗慶曆元年也素興年幼

好佚遊廣營宮室于東京築春登雲津二堤分種黃白  
花其上有遠道金枝縈城銀枝之目每春月挾妓載酒  
白玉案三泉溯為九曲流觴男女列坐闌草簪花以為  
樂時有一花能遇歌則開遇舞則動素興愛之命美人  
盤髻為飾因名素興花後又訛為素馨云素興立五年  
征歛苛急民不安生高國相與諸大臣共廢之後死偽  
諡天明思良之後無可立者乃更立思平之孫思庶思  
庶體貌魁傑德量過人國中翕然曰此我祖餘慶也皇



祐元年廣右儂智高陷邕州攻梧州狄青擊敗之謀入  
大理狄青遣楊文廣等率勁兵追之至阿迷州合江口  
智高已渡江不及而返智高之遁也其母與二弟留特  
磨道余靖乃令邕州守蕭注帥師潛往擒送闕下又募  
死士使大理以求智高智高子身投蠻至和泥其首盧  
豹等皆不及從蠻人疑之且虞其險詐鳩而殺之大理  
遂函其首以歸于京至是段氏始與宋通時宋兵駐邕  
大理震動因遣高護軍至曲靖以防不測而磨彌部酋

蒙提居烏蠻要害地爲梗高護軍因兵力取易隰龍城  
令人鎮守之思廉在位久改元保安正安正德保德高  
護軍死思廉于花樓前立高國公輔政碑命僧子雲撰  
文報其推戴之恩也在位三十一年避爲僧後諡孝德  
號興宗禪位于子連義改元上德時神宗熙寧八年也  
思廉在位素慕中國嘗欲求通至是遣人入貢神宗以  
遠人向化不欲深拒然非舊典故大理使者不領于鴻  
臚別爲禮遣連義立六年爲具臣楊義貞所弒時元豐

三年也義貞篡位凡四月岳侯高智昇遣子昇泰起東方兵討滅之而立連義之從子壽輝壽輝立改元上明以靖亂功加智昇太保封德侯子昇泰善闡侯高氏世執政柄威令盡出其手智昇因權勢太盛自求退位乃令昇泰代已為相而自領善闡牧建宅于五華山下鑿井得泉以居自號清侯又令工官伽宗築城于呈貢之西號伽宗城又以弟義勝治祿珠以高福守易門以高連虜治羅部以侄泰運守安寧于楚雄築外城號德江

城以封其侄子量成而巨橋皆世爲高氏有一門之盛  
半于大理矣壽輝立二年逼于高氏不自安避位爲僧  
更立思廉之孫正明改元保定時神宗元豐五年也後  
又改元建安天祐在位十二年性謹恪尚儉素哲宗紹  
聖元年亦避爲僧國人奉高昇泰立之是爲大中國改  
元上治而段氏中絕高氏聚族威楚而定遠之外已近  
北邊高氏嘗以爲患至是昇泰命雲南些莫酋徙民三  
百戶于廣蓬昇泰立二年將死謂其子泰明日段氏

不振國人推我我不得已從之今其子已長可還其故  
物爾後人勿效尤也昇泰死泰明遵父遺命復立段正  
明之弟正淳改元天授是為後理國以高泰明為相高  
泰運為柵主賞罰政令皆出其門國人稱為高國主波  
斯崑崙諸國來貢大理者皆先謁相國焉徽宗崇寧二  
年遣高泰運入朝求經籍得六十九家以歸後乾道中  
苗蔭使者見廣南人言其國有五經廣註春秋後語三  
史家註攷孟押韻集聖歷諸書皆泰運所求得也正淳

又改元明開天政文安在位十二年避為僧後卒偽諡  
中宗徽宗大觀二年子正嚴嗣改元日新文治永嘉保  
天廣運正嚴勤于政事愛民用賢與國主高量成謀遣  
使入廣南求內附觀察使黃璘奏聞許之政和六年遣  
進奉使天駟夾彥貴李紫琮副使坦綽李伯祥貢馬三  
百八十匹及麝香牛黃細氈碧圩山諸物又有樂人善  
幻戲即大秦鞞軒之遺名五花鬘弄徽宗愛之使梨園  
優人學之以供歡宴賞賜不貲七年宋遣使冊段和譽

為金紫光祿大夫檢校司空雲南節度使上柱國大理  
國王和譽疑即正嚴也後因大理通貢有上書請于大  
渡河外置城邑以便互市詔問得失知黎州宇文嘗言  
太祖觀地圖畫大渡河為境歷百五十年無患今于河  
外置城邑邊隙開非中國之福也乃止治黎州宣和中  
高泰運為相貽木夾于邊將駱魯瞻以求入貢高宗紹  
興三年廣西秦大理國求入貢及售馬皆因中國多故  
不見許惟于黎雋境內糞民私相貿易有司不禁焉五

年廣西邕州置提舉司市馬于羅甸等糞六年廣西經  
略安撫司奏大理貢象馬詔護送行在優禮荅之正嚴  
立四十年避位為僧後卒偽諡憲宗紹興十七年子正  
興嗣改元永貞大寶龍興盛明建德正興能守父遺緒  
高量成佐之亦稱賢相未幾量成退居威楚然國有大  
事正興必遣問乃決量成在威楚能恤孤寡老幼風俗  
化之稱為糞中君子正興立二十五年亦避為僧後卒  
偽諡景宗孝宗乾道八年子智興嗣改元利貞嘉會孝



宗淳熙八年大理相高護隆封其長子隆政為姚府越  
雋會川三郡演習智興使烏蠻阿郎為羅武部長其後  
裔孫法瓦浸盛併納淡呢共龍等地以其遠祖羅婺為  
部名淳熙十二年智興奉佛建興寶寺君相皆篤信佛  
教延僧入國朝夕梵咒不理國事于是國婦女悉赴僧  
舍受戒僧亦置室名火居僧智興在位二十九年偽  
諡宣宗寧宗慶元六年子智廉嗣改元鳳厯元壽在位  
六年卒無子偽諡享天寧宗開禧元年弟智祥立改元

天開智祥喜怒不常恃才妄作多好奇怪常東泛螳螂  
川于洛陽山上鑿十六羅漢建法華寺山下田免租以  
供僧人安寧溫泉亦盛飾宮殿男女異室極爲華麗又  
以段祖起于通海乃就秀山建啟祥宮令人守之理宗  
寶慶三年智祥改元仁壽在位三十四年禪位于子祥  
興後卒偽諡神宗祥興以理宗嘉熙三年立改元道隆  
初元太祖特穆津將南征大理至鐵橋石門關遇角端  
獸而還至是已滅金圖宋先謀取蜀宋余玠守重慶元

不能入乃議由吐番出大理淳祐元年黎州守閭師古  
言大理請道黎雅入貢安撫使孟珙却之使道邕廣四  
年蒙古兵出靈關蜀人震恐大理遣將高禾迎戰敗死  
會元主諾格德依卒兵還宗遣使祭禾以其禦元也祥興  
在位十六年卒偽諡孝義子興智嗣改元天定時宋淳  
祐十二年即元憲宗元年也元復議南征命太弟呼必  
賚分三道以宋寶佑元年十一月進薄大理興智及其  
相高泰并迎戰大敗興智奔善闡泰祥奔姚州被執諭

之降不屈命斬于五華樓泰祥臨刑嘆曰段運不回天  
使其然為臣隕首吾事畢矣時白日當午忽雲起雷震  
太弟異之曰忠臣也禮葬之其妻段氏抱少子瓊泣訴  
太弟指謂侍臣曰此忠臣之後善視之乃命世其官長  
子長壽在威楚內附即以為歲楚萬戶寶佑二年太弟  
班師留大將烏蘭哈達經畧雲南攻善闡克之興智被執  
入朝赦以為瑪哈羅嗟領諸蠻從征交趾後又入朝未  
至卒元遣使諭祭追贈大理向義王賜物歸葬以其弟

段實為總管卒與元相終始焉段氏自段思平至興智  
共二十二世皆僭稱皇帝有廟諡年號凡三百五十年  
而國亡宋史成于元托克托大理國傳寥寥無可表見豈  
為其遠保一方征伐聘問之所不及而畧之與按自後  
唐以迄南宋中國相尋于干戈獨雲南一隅享太平者  
三百餘載其恩澤及人亦遠矣匪獨其主賢也即高氏  
之為相如岳侯之保境養民智昇之討滅篡逆泰明之  
復子明辟泰祥之殺身成仁咸不媿為世臣焉故詳紀

其始末以補正史所未備

滇考卷上